

2 TIMOTIY

Pol Minj Kisen Ak Timotiy Nup Tikak

Minim Nind Niņep

Pol minj kisen Timotiy nup tikak biy, nuk Rom kalambis mindiy, nup pisnep pikayningiy rek ayek niņiy, Timotiy nup minj tikyokiy angak, “Jel pirikiy nambin ma dinimin; biynimb Krays ker Yipiyses mindpay gok kuyip, kond mindrep ginimin angak.”

Minim Ar Keykey Mindip Rek:

Minim day nind angak ak mindip, chapta 1:1-2.

Gor angak, wong nup gipun ak, tep aspiyn angak minim ak mindip, chapta 1:3–2:13.

Timund winjikiy minim kilis rek gunap angak ak mindip, chapta 2:14–4:5.

Pol nuk Gor nup chingiy nep mind dand apiy, kumemb ñin nuk ak maņgakniņ, ma pirikak minim ak mindip, chapta 4:6-18.

Minim ang jiwning, “Nimb mindpim” angak minim day won ak mindip, chapta 4:19-22.

1 ¹Yand Pol. Gor yip angak, bi minim nup dand amemb ak mindiy, Jiysis Krays nup chingiy, perper mindeningambim angak minim ak angñirapiyn. ²Ñi tep yand Timotiy, nip minj tiksipiyn. Bapiy Gor yip, Ñinuk Jiysis Krays yip nip simb niņiy kond minder, kapkap mindrep ginimin.

Gor Minim Angning Nambin Ma Dinjun

³Yand apis basind sikop, Gor nup gosimb niņyngipay rek nep niņbiyn ak mey, gos yomb gunap ma niņbiyn. Nup gosimb niņyng, pumbnamb kisyimken nup tep apiyn. ⁴Nip kiring apenik siy angnak ak, niņyng mindpiyn. Kun ak nip am niņen, yip tep ginimuņ angiy niņbiyn.

⁵Nand Gor nup chingrep gipan ak, niņyng mindpiyn. Napis Loyis yip, nanim Yiwniys yip nup chingrep giy mindyngipiyr rek, nand kunep

gipan. ⁶Kun ak nip ñin jun ar ay, Gor Kawnan nuk yokek, ap nand yip nep mindip ak, ma pirikninin; angek wong giyngipan rek ginimin. ⁷Chinup Kawnan nuk yokip ak, ma pirikpun; key mindrep giy, biynimb wasemb ay, Gor nup direp yimb gipun.

⁸Kun ak, Gor wong genik, yip kalambis ayak ak, nambin ma dinimin. Nand key kunep, Gor minim angiy angiy, nambin ma diy, biynimb gok kuyip monmon angñinimin. Pen Gor nip kond mindip rek, minim tep nup ak angñirangey, nip timey geniñgiy, gos kuñay ma niñninin. ⁹Chinup dak ak, miñ tep gonuk niñiy ma dak; nuk key chinup simb niñak rek dek, biynimb suñ-tep nuk mindpun. Miñmon ma alwol gayak ñin ak, nuk biynimb simb niñiy diniñgamb rek, gos niñak ak mey, ¹⁰miñiy Ñinuk nup yokek apiy, kumiy tikjakak rek, minim kun ak miseñ niñbun. Kumiy pisnep kuyiñg yowpinup ak pen, minim tep nuk dand owak ak dipun rek, perper mindonjun rek ayip.

¹¹Ar kun ak nep, Gor yip angek, bi Jiysis minim dand amemb ak mindiy, biynimb okok kuyip angñi tapiyn. ¹²Angñi tangen, yip timey gey, kosyam mindpiyn ak pen; ñawil amnakniñ ma mindpiyn. Biyomb tep Jiysis nup gosimb niñbiyn rek, nambin ma diy, biynimb okok kuyip monmon angñimbiyn. Minim tep yip angñinimin angak kun ak, ma kurginiñgamb; nuk gek mind dand amiy amiy, ñin yomb nuk ak winiñgamb.

¹³Kun ak, Jiysis Krays nup gosimb niñyñg, biynimb wasemb ayiñg, minim angen niñban ak, yipund giy nep mindip angiy, biynimb gok kuyip angñinimin. ¹⁴Minim tep ñin ar nip aynik kun ak; biynimb gunap minim monmon okok nimb gunap, sesek wilikniñgiy rek ayip ak, niñrep ginimin. Gor Kawnan yip mindpun rek, nip gos tep ñek, sisker angñeniñgiy niñiy, biynimb gok kuyip angñirep ginimin.

¹⁵Nand niñban: kalambis minden; Piyeñylas sek, Hemoseniys sek, biynimb kiyk Esiya nimb gok mañgiysek yip kirgiy ambay. ¹⁶⁻¹⁸Binak Onesiyporas nep yip ay mindip. Miñmon Rom biy kalambis minden nuk apiy, nambin diniñgayn angiy yip ma kirgak; kosyam piyow niñiy, ap yip niñak. Ñin kuñaynep ap niñek, yip tep yimb gip. Kun ak, Biyomb chin ak nup angñiniñgiy apiyn, “Onesiyporas biynimb nup gok sek kond mindenimin, ñin yomb nand ak apek, Onesiyporas nup simb niñninin apiyn.” Pen Yipiyses mindenik, yip direp yimb giyngip ak niñrep gipan.

Jiysis Nup Chiñgiy Amiybi Nuk Rek Mindonjun

2 ¹Ñiyand Timotiy. Gor chinup simb niñiy, Ñinuk Jiysis Krays nup yokek apiy, chinup angiy kumak ar ak nep, Gor yip jimñiy mindpun. Kun ak Jiysis nup chiñgiy, gosimb gunap ma niñninin. ²Minim tep biynimb okok kuyip, per angen niñban ak; biynimb Gor nup direp giyng mindeniñgambay gunap piyow niñiy, angñirep genimin; kiy pen biynimb gunap kuyip, angñirep giniñgiy.

³Gor nup woŋg gipun rek, biynimb gunap chinup timey gipay. Yip kunep giniŋgiy aŋgiy pirikiy, Biyomb tep chin anup ma kirginimin; woŋg nup ak monmon ginimin.

⁴Amiybi gok, woŋg mis okok giniŋg, tap kiyk okok gos ak ma niŋbay; biyomb kiyk anup tep gaŋ aŋgiy, gos nokom niŋbay. ⁵Biynimb resis gipay gok, bi resis kond mindpay gok, apay apay rek nep giy, tap dipay.

⁶Pen biynimb manj woŋg gipay gok, tiŋiy yiwur gipay rek, nind yinŋñimbiy, kisen biynimb gunap kuyip yinŋñimbay. ⁷Gor nip gos ñimb rek, minim maŋgiyseki niŋnimin rek ayip ak mey, minim apiyn kun gok niŋyinŋ mindey, Gor nip gos ñek, niŋrep giniŋgamban.

⁸Jiysis Krays minim tep per apiyn ak, sakiy ma ginimin. Basind yes Depiyt tikek, tik dand amiy, nup tikyak. Pen yomb giy ñaŋgayey kumi, tip ak tikjakak. ⁹Yand tap siy tap timey ma giy, minim kun anep aŋgenik, yip timey giy kalambis ayey mindpiyn. Pen Gor minim ak, kalambis ma mindip; miñmon okok kind kind amjap. ¹⁰Kun ak, yip timey gipay rek, gos yomb ma niŋbiyn; Gor biynimb nuk diniŋg niŋayak gok, Jiysis Krays nup gosimb niŋsipay rek, perper mindeniŋgambay gos anep niŋbiyn.

¹¹Minim aŋgniŋg gispiyn biy, minim niŋind yimb niŋiy, pisnep dep ak.

Jiysis chinup nen kumak ak, chin yip kumnuk rek ayip ak mey; nuk yip kim mindeniŋgambun. ¹²Nup chiniŋgiy miker diyinŋ, nup ma kirginiŋgambun ak; nuk kiyŋ mindiy, biynimb kond mindeniŋgamb ñin ak, yip mindiy mindrep yimb giniŋgambun. Pen nup kirgoniŋgambun, chinup kunep kirginiŋgamb. ¹³Nup minim gunap aŋgiy, kisen kirginiŋgambun ak pen; nuk minim chinup aŋgip ak ma kirginiŋgamb; giniŋg nep aŋgip.

Biynimb Woŋg Girep Gipay Gok, Gor Windin Yirik Ar Ak Mindpay

¹⁴Gor niŋmindakniŋ, biynimb gok kuyip aŋgrop genimin, minim ar keykey aŋgiy penpen ma aŋgniŋgiy. Gor minim aspun apay ak pen; minim apay kun ak rek, biynimb gok kuyip gos timey ñek, mindrep ma giy, apyap pikniŋgiy rek ayip. ¹⁵Pen Gor minim nup ak niŋrep giy, kuyip aŋñirep giyinŋ, nambiŋ ma dinimin. ¹⁶Minim monmon okok aŋg amiy apiy gipay ak, nand yip ma aŋgnimimb. Aŋg dand amiy apiy giy, mindrep ma yimb giniŋgambay. ¹⁷Soy sikoy bap ay, mind dand amiy, yomb yimb ayip rek ak giniŋgamb. Bi tiysa Haymeniyas yip, Payliytas yip ar kun ak gipyr. ¹⁸Gor minim tep ak kirgiy apay, “Chin kumi tip ak ma tikjakniŋgambun; yikop Gor nup gosimb niŋbun rek, tip tikjakpun apay.” Pen kiyk minim yipund ma gip kun ak aŋgey, biynimb gunap Jiysis minim niŋind yimb ak kirpay.

¹⁹Pen biynimb Jiysis nup gosimb niŋbay gok, kamb rek piŋiy wos giy mindpay. Kun ak, nup ma kirginiŋgambay. Baybol buk ak tikiy aŋgyak, “Biyomb ak, biynimb nup ker mindpay gok kuyip, niŋimb aŋgyak.”

Minim bap pen tikiy angyak, “Biynimb Biyomb ker mindpun apay gok, timey ar gok ma giningiy angyak.”

²⁰Pen korip yomb yimb gok, diys keykey mindip. Diys gunap, gol tap gok diy giyak. Gunap pen mon, man, tap yikop gok nep diy giyak. Gunap diy, tap gach mer, tap tep tep gok nep aypay; pen gunap tap gach tap monmon okok aypay. ²¹Kun ak, Biyomb biynimb nuk tap gach tap monmon okok asikrep giningambay gok, suŋ-tep mindpay rek niŋiy, di woŋg tep nuk yerip yerip mindeningamb gok, angyayek giningambay.

²²Pen bi paranj gunap, gos timey niŋbay rek ma niŋnimin. Bi suŋ-tep minden angyiy, gey amnimuŋ. Gor nup gosimb niŋiy, biynimb gok kuyip direp giy, kapkap mindiy, biynimb Biyomb chin anup gosimb niŋiy, mindrep gipay gok yip, mindrep ginimin. ²³Pen minim yikop anŋ amiy apiy giy, penpen apay gok, nand yip ma anŋnimimb. ²⁴Bi Gor nup woŋg giningiy gok, penpen ma angyiy, kapkap mindiy, biynimb direp giy, anŋniŋrep giningiy. Kuyip timey gey, pen timey ma giningiy. ²⁵Pen biynimb gunap minim kuyip ma deningiy, kapkap anŋniŋrep giyŋg mindey mey; Gor biynimb kun gok kuyip gos tep ŋek, yenen kun gipun angyiy, andkind nup ker apiy, minim yipul yimb ak niŋiy, diningiy rek ayip. ²⁶Kun ak, Seytan kuyip yesek tom giy dek, kind nuk ak mindiy, minim nup niŋiyŋipay ak kirgiy, mindrep giningambay.

Ñin Kisen Ak Winiŋ Gakniŋ Mindrep Ma Yimb Giningambay

3 ¹Pen nand niŋban: ñin kisen ak winiŋ gakniŋ, kosyam mindeningambay. ²Ñin kun ak, biynimb mindrep ma yimb giningambay. Maniy nep gos niŋiy, mumbwak kiyk nep gos niŋiy, timey nep giy, Gor nup anŋjiwiŋ, nop nonim sikop kuyip minim timbrikiy, biynimb gok minim tep ma angyiy, Gor nup gosimb ak ma niŋiy, ³biynimb wasemb ma ay, kuyip yergey niŋiy ma kirgiy, biynimb anŋjiwiŋ, kalrimey jiwiŋ, mindrep gep miñ ak niŋey, kuyip miluk yowningamb. ⁴Biynimb gok kuyip direp ma giy, monmon timey giy, chin nep biynimb yomb mindpun angyiy, key miñmiñ gun angyiy, Gor nup kirginingambay. ⁵Lotiw rek giningambay ak pen, Gor biynimb direp ginimuŋ rek ma ayip angyiy niŋningambay. Biynimb kun ak rek gipay gok yip, yingong ma ginimin.

⁶Biynimb kun gok rek gunap, bi gok minim chinup ak ma diningambay angyiy, biyn gos niŋrep ma gipay gunap, piyow niŋbay. Korip gunap kapkap amiy; biyn tap siy tap timey giy, gos yomb niŋyŋg mindpay gok niŋiy anŋniŋmbay. ⁷Biyn kun gok rek, minim okok nimb okok nimb niŋningambay ak pen, minim niŋind yimb ak ma dipay. ⁸Pen bi Jeniys yip, Jambriys yip Mosis minim anŋgak ak, yiruk niŋrik rek, Yipiyses bi aspun gok, minim yipund giy mindip ak kunep gipay. Gos kiyk ak timey yimb gip; Gor nup gosimb ak kirpay. ⁹Pen gipay ar kun ak, tapin gey amnimuŋ rek ma mindip. Jeniys yip, Jambriys yip timey gerik, biynimb niŋyak rek, biynimb miñiy mindpay gok, kunep miseŋ niŋningambay.

Gor Minim Ak Direp Ginimin

¹⁰Pen yand yip tanjyngipur rek, miñ yand gipiyn ak niñrep gipan. Gor nup gosimb nokom niñiy, wong nup ak marik yimb giying, biynimb gok kuyip simb niñiy angñirep gipiyn. ¹¹Biynimb miñmon Antiyok, Aykoniyam, Liystra okok yip timey gey, kosyam mindenik ak pen; Gor yip kond mindek ak niñban.

¹²Biynimb Jiysis Krays nup chingiy, angip rek giniñgambay gok, kuyip mangiysek miker ñey, kosyam mindeniñgambay. ¹³Pen biynimb timey, minim yesek ar ak angñimbay gok, timey yimb gey amek, kiyk key Gor kinjeñ tep ak ma niñiy, biynimb gunap kuyip, minim yesek gok angñey niñniñgambay.

¹⁴Pen nand ñiskoy miñg mindiy, minim niñind ak anjey, niñrep ginak ak mey, niñying mindenimin. Chin biynimb nip angñonuk niñnak gok, mindrep gipun rek niñban. ¹⁵Ñiskoy yimb mindenak ñin ak, nip Baybol buk minim tep ak angñiyak. Biynimb gok minim tep kun ak niñey mey, Gor kuyip di nuk yip jimñiy ayip. ¹⁶Baybol buk minim ak mangiysek, Gor Kawnan ak nep gos ñek, tikyak ak mey; minim nokom kun ak diy, biynimb gok kuyip yikop angñiniñgambun; timund winjkniñgambun; suñrep mindeyan angiy, angrep giniñgambun. ¹⁷Bi Gor nup wong giñimbay gok, Baybol buk minim kun ak diy mey, biynimb gok kuyip miker yerip gek, niñrep yimb giy, kuyip angñirep yimb giniñgambay.

Gor Minim Yipund Giy Yimb Ak Angñinimin

4 ¹⁻²Nip aspiyn: Gor minim yipund giy yimb ak, kilis giy angñinimin. Gor apiymiñay biyomb yimb mindpiyr rek, Ñinuk apiy, biynimb gok kond mindeniñgamb. Ñin kun ak, apiymiñay giy biynimb kumyak gok sek, kim mindeniñgambay gok sek bilok keykey ayniñgayr. Kun ak mey, Gor minim ak minek minek angñinimin. Biynimb gok kuyip tep giniñgamb akañ, tep ma giniñgamb angiy yiruk ma niñnimin; niñrep giyan angiy, ang giying, niñchikiy angying, kapkap angñirep giying mindenimin. ³Yenen: ñin kisen ak, Gor minim yipund giy ak niñiy ma diniñgambay; minim yesek gos kiyk key amimb ar gok nep, anjey niñiy diniñgambay. ⁴Gor minim tep ak kirgiy, kesim yikop gok anjey, kasek niñniñgambay.

⁵Pen yerer giniñgamb ak, gos niñrep giying mindenimin. Miker gonimuñ, gos yomb kun ak ma niñnimin. Nand bi Gor nup wong giñemb ak, minim tep nup ak, angñiyiñg nep mindenimin.

Wong Yand Ak Gi Jiwniñg Gispiyn

⁶Yand Krays wong nup gen, yip kalambis ayeyak minden minden, miñiy pikayon likañ nup yownimuñ angiy, yip gispay. Kun ak, lum ar

mindpiyn biy, kiring amemb ñin ak, mañ mindip. ⁷Yand Gor nup gosimb niñmindiy, wong yip anggak ak ma kirpiyn; anggak rek mañgiyseki gipiyn. ⁸Nuk Biyomb niñrep giy angkip ak mey; yerip yerip gipiyn ak niñmindiy, ñin yomb nuk ak apek, yip anggek mindrep giniñgayn. Yand nep mer: biynimb Biyomb asaw anggiy, tep gakniñ kond mindpay gok mañgiyseki giniñgamb.

⁹Timotiy. Yand mindpiyn biy, kasek winimin. ¹⁰Bi yand yip mindyngipun gok, miñiy yand yip biy ma mindpay. Binak Demas tap man ar biy gos niñiy, yip pisnep kiring miñmon Tesalonayka amnak. Bi yand Kreyseniys miñmon Galesiya amnak. Ñi Taytas miñmon Dalmesiya amnak. ¹¹⁻¹²Tikiykas nup angkyoken, miñmon Yipiyses amnak. Pen Luk yand yip mindpur. Nand pen, Mak nup am poñind apey, yand yip mindiy, Gor wong ak ginjur. ¹³Winiñgamban ñin ak, miñmon Trowas apiy, kolsiyor yand ak, binak Kapas korip daynik ak diy, buk meymey siypsiyp wak yimb sek tikyak gok mañgiyseki diy, dand winimin.

¹⁴Bi kapa wong gip Aleksanda yip minim yesek yimb anggiy kor gip. Yip gip kun ak, Gor nup pen kunep giniñgamb. ¹⁵Minim tep chin apun ak, nup yiruk timey yimb gip ak mey; yip timey gip rek, nip kunep ginimuñ rek ayip ak, niñrep ginimin.

¹⁶Yip nind kor giyak ñin ak, biynimb bap yip kund okok niñmindek kor ma ginik; mañgiyseki yip kirgiyak. Pen Gor kuyip, gos kun ak niñyiny ma mindonimuñ. ¹⁷Yip kor giyak kun ak, Gor yip kond mindakniñ, minim tep nup ak biynimb okok nimb kuñaynep ap mindeyak gok kuyip sakiy giy anggenik niñyak. Pen kayn ayndik gok, yip siwñiñningiy rek ma ayak. ¹⁸Yand niñbiyn: Gor yip kond mindek, tap bap yip ginimuñ rek ma ayñiñgamb; yip dand miñmon tep nuk ak amniñgamb. Bi tep kun ak, yimb nup ak, perper nep dey aranimuñ. Tep.

¹⁹Binak Akiwiyla sek biynuk Priysiyla sek, binak Onesiyporas biynimb korip nuk mindpay gok sek kuyip anggnimin, Pol “Nimb mindpim?” anggi anggnimin.

²⁰Binak Yirastas biy ma owak; mindip miñmon Koriyn. Binak Tropiymas nup tap gek, kiring ownik miñmon Mayliytas.

²¹Yiñgen yomb wip ñin ak mañ mindip rek, kasek winimin.

Pen Yiwbiyiwas, Pudens, Liynas, Kilawdiya biynimb gok kuyip, biynimb Jiysis minim niñbay akniy mañgiyseki, “Nimb mindpim?” aspay.

²²Biyomb tep chin ak, nip kond minden. Nimbip simb niñiy, direp ginimuñ.